

**ԱՆԴՐԿՈՎԿԱՍՈՒՄ ԱՊԱՍՏԱՆԱԾ ԱՐԵՎՄՏԱՀԱՅ
ԳԱՂԹԱԿԱՆՈՒԹՅԱՆ ԹՎԱՔԱՆԱԿԻ ՀԱՐՑԻ ՇՈՒՐՁ (1914 – 1917թթ.)**

Է.Գ.ԴԱՆԻՆԵԼՅԱՆ

1914 – 1922թթ. Հայ ժողովուրդը Գողգոթա ապրեց: Այս տարիներին պաշտոնական Թուրքիան իրագործեց նախապես բռնադատական մշակած մի ողջ ժողովրդի ցեղասպանությունը: Ի տարբերություն Թուրք պետականության նախորդ սուլթանական վարչակարգի երիտթուրքականը դրել էր ընդհանրապես Հայ ժողովրդի բնաջնջման հարցը: Եվ պատահական չէ, որ ցեղասպանությունն իր սեւ ալիքների մեջ էր առել և՛ Արևմտյան Հայաստանը, և՛ Պարսկահայաստանը, և՛ Արևելյան Հայաստանը:

Հատկապես ծանր կորուստներ տվեց Հայ ժողովրդի արևմտահայ Հատվածը: Ցեղասպանությունից փրկված արևմտահայերը դեռևս 1915թ. ծվատվեցին երեք ցաք ու ցրիվ Հատվածների: Մի Հատվածը, Հիմնականում երեխաներ ու երիտասարդ կանայք, մնաց բուն երկրում և մահմեդականացվեց: Ըստ անգլիական «Կապույտ գրքի»՝ նրանց թիվը մոտավորապես 250 հազար էր¹: Երկրորդ մասն աքսորվեց արաբական անապատներ, իսկ երրորդ Հատվածն ապաստան գտավ Կովկասյան ռազմաճակատի շրջանում՝ մասնավորապես Արևելյան Հայաստանում:

Պատմագիտական գրականության մեջ Անդրկովկաս անցած արևմտահայ գաղթականության թվաքանակի հարցի շուրջ շրջանառվում են իրարամերժ և հակասական տվյալներ՝ սկսած 300 – 350 հազարից մինչև 650 հազարը: Իսկ որոշ ուսումնասիրողներ էլ միայն Ռուսաստան անցած գաղթականների թիվը հասցնում են 600 հազարի: Նման անճշտությունները ունեն իրենց պատճառները. 1. Բացակայում է գիտական հիմունքներով կատարված վիճակագրությունը: 2. Կապված սովի և համաճարակների, ինչպես նաև Կովկասյան ռազմաճակատի իրավիճակի ու Անդրկովկասի քաղաքական կացության վայրկյանների հետ՝ գաղթականությունը բավական հոսուն է եղել, չի ունեցել իր մնայուն տեղավայրերը: 3. Որոշ ուսումնասիրողներ «Հայ գաղթականություն» հասկացությունը չփոթել են «արևմտահայ գաղթականություն» հասկացության հետ: Մինչդեռ, առաջին աշխարհամարտի տարիներին Անդրկովկասում և ռուսական զորքերի գրաված վայրերում գոյություն ունեին Հայ գաղթականների մի քանի կատեգորիաներ՝ արևմտահայ, պարսկահայ, արևելահայ: Եթե 1914 – 1916թթ. Հիմնականում կային Հայ գաղթականության երկու կատեգորիաներ (պարսկահայ, արևմտահայ), ապա կապված դեպի Անդրկովկաս թուրքական զորքերի 1918թ. արշավանքի հետ, ամբողջովին տեղահանվում և գաղթականի ցուպն են բռնում նաև Ռուսական կայսրության նախկին հայկական մարզերի՝ Կարսի, Մուրմալուի շրջանի, Նախիջևանի, Ախալքալաքի, Ախալցխայի, ինչպես նաև Թուրքիայի կողմից Հայաստանի Հանրապետությունից նվաճված գավառների հայերը: Այլ խոսքով ասած՝ արդեն գործ ունենք գաղթականության նոր կատեգորիայի՝ արևելահայ գաղթականության հետ: Սկզբնաղբյուրներում 1918թ. համար Հայ գաղթականության թիվը ցույց է տրվում 600 հազար, որը

¹ Տե՛ս Кавказское слово, 2. III. 1917.

իրականությունը մոտ է: Դրանք հիմնականում արևելահայ գաղթականներն են: Սակայն որոշ ուսումնասիրողներ այս թիվը շրջանառության մեջ են դնում որպես արևմտահայ գաղթականության հսկիչ թիվ:

Ըստ Զ.Գրիգորյանի, «Առաջին համաշխարհային պատերազմի տարիներին թուրքական լաթադանից փրկվելով՝ Հյուսիսային Կովկասում, Ուկրաինայում և Ռուսաստանի կենտրոնական մարզերում ապաստան էին գտել Հինգ-վեց հարյուր հազար հայ գաղթականներ: Հայ գաղթականների նոր խոշոր հոսանք դեպի Ռուսաստան սկսվեց 1918թ., թուրքական բանակների Արևելյան Հայաստան ներխուժման հետևանքով»²: Իսկ Ս.Ալիխանյանը գրում է. որ «Արևմտյան Հայաստանից Անդրկովկաս գաղթած հայերը ցրվեցին նրա գրեթե ամբողջ տերիտորիայում: 650 հազար գաղթականներից Հայաստանում կուտակվեց 400 հազար հոգի, Վրաստանում՝ 150 հազարը»³: Ա.Վարդապետյանն իր հերթին պնդում է, թե 600 հազար գաղթականությունն անցել է Խորհրդային Ռուսաստան⁴: Մինչդեռ, աղբյուրները վկայում են, որ 600 հազար գաղթականներից կարողացել էր Հյուսիսային Կովկաս անցնել միայն 150 հազարը, որից 130 հազարը արևելահայ և արևմտահայ գաղթականներ էին, մնացած 20 հազարը՝ հույներ և ասորիներ⁵:

Մասնագիտական գրականության մեջ հանդիպող այս կարգի ոչ ճիշտ վկայությունները հետևանք են այն բանի, որ ցեղասպանությունից փրկված հայ գաղթականության պատմությունը, հատկապես նրա շարժը, հատուկ ուսումնասիրության նյութ չի դաժել: Գաղթականության առաջին հոսքը դեպի ռուսական Բասեն կատարվեց Քյոփրի-քյոյից ռուսների նահանջից հետո (1914թ. նոյեմբերի 22 - 24): Գաղթականներին տեղավորեցին սահմանամերձ շրջանների հայկական գյուղերում⁶: Գաղթականության համեմատաբար ավելի ուժեղ ալիքը առաջացավ Սարիղամիշի հայտնի օպերացիայի ժամանակ՝ 1914թ. դեկտեմբերի 19 - 22-ին: Ժիշտ է, ռուսներին հաջողվեց Սարիղամիշի մոտ կանգնեցնել թուրքերի հակահարձակումը, ջախջախել նրանց և մինչև հունվարի 5-ը վերականգնել իրենց նախկին դիրքերը, սակայն ռուսական զորքերի դեկտեմբերյան ժամանակավոր նահանջը մեծ խուճապ էր առաջացրել Պարսկահայքի, Ատրպատականի, Կարսի, մասամբ նաև Արևմտյան Հայաստանի սահմանամերձ որոշ շրջանների բնակչության մեջ, որի հետևանքով տասնյակ հազարավոր գաղթականներ, թողնելով իրենց բնակավայրերը, շարժվեցին Արևելյան Հայաստան: Գաղթել էին ոչ միայն հայերը, այլև ասորիները և հույները: Փախստականների թիվը

² Զ. Գրիգորյան, Հայ և ռուս ժողովուրդների դարավոր բարեկամությունը, Ե., 1967, էջ 118:

³ Ս. Ալիխանյան, Հայկական գործերի կոմիտարիատի գործունեությունը (1917 - 1921), Ե., 1956, էջ 112:

⁴ Տե՛ս Ս. Վարդապետյան, Հայաստանի օգնության կոմիտե (1921 - 1937), Ե., 1966, էջ 19:

⁵ Տե՛ս ՀՀ նորագույն պատմության պետական կենտրոնական արխիվ, ֆ. 123, ց. 42, դ. 2, թ. 49:

⁶ Տե՛ս Отчет о деятельности состоящих при Кавказском армянском благотворительном обществе армянского центрального комитета помощи пострадавшим от войны, Тифлис, 1917, с. 3 (այսուհետև՝ Отчет при КАО АЦК...): Տե՛ս նաև ՀՀ Պատմության կենտրոնական պետական արխիվ (այսուհետև՝ ՀՀ ՊԿՊԱ), ֆ. 28, ց. 1, դ. 132, թ. 30:

1914թ. վերջերին – 1915թ. սկզբներին հասնում է 100.000-ի⁷, որից հույներին⁸ 20 հազար⁹, ասորիներին¹⁰ 20 հազար⁹:

Հարկ է նշել, որ հայերի կոտորածները սկսվեցին 1914թ. վերջերից՝ երիտթուրքական հանցախմբի 1915թ. ապրիլի 15-ի տխրահռչակ հրահանգից ամիսներ առաջ, և նրա առաջին զոհերը դարձան Թուրքիայի քաղաքացի Հանդիսացող պարսկահայերը, ասորիները և Կարսի մարզի արևելահայերը: Ջարդերը կատարվում էին աներևակայելի դաժան մեթոդներով. կատարողը թուրքն էր, հետևաբար՝ թուրքավարի: Հետևաբար, միանգամայն սին են թուրք պատմագիրությունը, այն պնդումները, թե արևմտահայերը՝ որպես օսմանյան քաղաքացիներ, օրինապահ չգտնվեցին, որի հետևանքով էլ տեղի ունեցան նրանց տեղահանությունն ու ջարդերը: Ռուսական բանակի հաջող ռազմական գործողությունները հնարավորություն տվեցին, որ փախստականները 1915թ. գարնանից վերադառնան իրենց բնակավայրերը:

Գաղթականության երրորդ՝ ամենամեծ շարժը, տեղի ունեցավ ռուսական Կովկասյան բանակի 1915թ. հուլիսյան նահանջից հետո: Հայտնի է, որ Սարիղամիշի մոտ թուրքերի ծանր պարտությունից հետո ռուսները 1915թ. գարնանն անցնում են հակահարձակման և այսպես կոչված «Ալաշկերտի օպերացիայի» ընթացքում մեկը մյուսի ետևից գրավում են Թավրիզը, Ուրմիան և շարժվելով Ալաշկերտի հովտով՝ թուրքերից ազատագրում են Ալաշկերտը, Բաշկալեն, Մանազկերտը, Շատախը, Արճեշը, Կոտուրը, Վանը, որից հետո հարձակման սլաքն ուղղվում են Մուշի և Բիթլիսի վրա:

Սակայն, 1915թ. հուլիսի կեսին կատարվեց ռուսական բանակի երրորդ անակնկալ նահանջը, որի հետևանքով թուրքերը վերանվաճեցին Արևմտյան Հայաստանի մեծ մասը և հասան Կաղզվանի հարավային մատույցները: Ծիշտ է, մի քանի օր հետո ռուսները անցնում են հակահարձակման և մինչև 1915թ. հուլիսի 29-ը դուրս են գալիս նախկին բնագծերը, սակայն նրանց հերթական նահանջն աղետալի հետևանք ունեցավ մեր ժողովրդի պատմական ճակատագրում:

Ռուսական զորքերի խորհրդավոր նահանջին հետևեց Վանի, Բիթլիսի ու Էրզրումի վիլայեթների, մասամբ Պարսկահայքի հայերի խիստ անկազմակերպ և քաոսային գաղթը: Եթե ռազմական գործողությունների Արևմտյան ճակատում ցարական իշխանությունները, մինչև նահանջը, նախապես հայտնում էին բնակչությանը և պետականորեն կազմակերպում բնակչության գաղթը, ապա նույն բանը չկատարվեց Կովկասյան ռազմաճակատում: Այստեղ, որպես կանոն, ռուսական բանակների նահանջը խիստ գաղտնի էր պահվում և բնակչության շրջանում նախազգուշական ոչ մի միջոցառում չէր ձեռնարկվում¹⁰: Մինչդեռ, ցարական իշխանություններին քաջ հայտնի էր, թե ինչ էր սպասվելու հայերին նահանջից հետո:

Արևմտահայ փախստականներն Արևելյան Հայաստան էին անցնում երեք ուղղություններով՝ Կարսի, Իգդիրի, և Զուլֆայի: Կարսի գծով անցել էին 19.418 փախստականներ: Նրանք հիմնականում թուրքական Բասենի բնակիչներն էին: Իգդիրի գծով անցել էին Բիթլիսի, Մշո, Վանի, Մանազկերտի, Պատնոսի, Այնթապի, Աբաղայի, Ալաշկերտի շրջաններից՝ 170.000 փախստականներ: Զուլֆայի գծով՝

⁷ Տե՛ս ՀՀ ՊԿՊԱ, ֆ. 28, ց. 1, գ. 109, թ. 165: Մշակ, 4.1. 1915:

⁸ Տե՛ս ՀՀ ՊԿՊԱ, ֆ. 28, ց. 1, գ. 117, թ. 2:

⁹ Տե՛ս Մշակ, 11. I. 1915:

¹⁰ Տե՛ս Համբավաբեր, 3. IV. 1916:

Աղբակի և Պարսկաստանի այլ շրջաններից ուղևորական սահմանը հասել էին 18.055 փախստականներ: Այսպիսով, արևմտահայ և պարսկահայ փախստականների թիվը կազմում էր շուրջ 207.473: Բացի այդ, կային նաև 7.320 արևելահայ փախստականներ, որոնք գաղթել էին Օթթի, Արդանուշի, Արդվինի, Արդահանի շրջաններից: Հարկ է նշել, որ այդ ժամանակ Վանի շրջանից Պարսկաստան էին անցել և այնտեղ էին գտնվում 10.000 փախստականներ և 3.500 որբեր¹¹: Այսպիսով, Հայ փախստականների ընդհանուր թիվը 1915թ. ամռանը (Անդրկովկասում և Պարսկաստանում) 228.293 էր, որից շուրջ 200.000-ը արևմտահայ փախստականներ էին, մնացյալը՝ պարսկահայ և արևելահայ փախստականներ:

Գաղթականությունը չափազանց հոսուն զանգված էր և անընդհատ գտնվում էր շարժման և տեղափոխությունների մեջ: Այդ պատճառով էլ գաղթականների ընդհանուր թվաքանակի վերաբերյալ համեմատաբար հավաստի տեղեկություններ են տալիս և գիտական մեծ արժեք ունեն մեկօրյա վիճակագրությունները: Կովկասում գաղթականների գործերի գլխավոր լիազոր գեներալ-մայոր Վ.Թամամշյանի հանձնարարությունով, պետական գանձարանի հաշվին, Հայկական կենտրոնական կոմիտեն 1916թ. հունվարի 14-ին կատարեց գաղթականների համընդհանուր մեկօրյա ցուցակագրություն, որին մասնակցեցին ավելի քան 700 հոգի:

Գաղթականների մեկօրյա հաշվառումից դուրս էին մնացել մոտ 31.000 հոգի: Այդ թվում՝ 1000 որբեր՝ ապաստարաններում, 12000 հոգի՝ Վանի վիլայեթում, 10000 հոգի՝ Բիթլիսի վիլայեթում, 1000 հոգի՝ էրզրումի վիլայեթում, 4000-ը՝ Բաքվում, 1000-ը՝ Ախալքալաքում:

Աղյուսակ 1. Հայ գաղթականների ընդհանուր թիվը, սեռը, տարիքը՝ ըստ 1916թ. հունվարի 14-ի մեկօրյա հաշվառման

Նահանգներ	Կայան տեղի թիվը	Ընդամենը՝ նրի թիվը	Հասակ			Սեռ		
			մինչև 5 տարեկան	5-16 տարեկան	16 տարեկանից բարձր	ընդհա - նուր թիվը	արական	իգական
Երևանի	263	20394	8938	28831	55159	92928	45705	47223
Թիֆլիսի	14	3191	1549	3750	7951	13250	6532	6718
Գանձակի	51	2279	352	1996	4237	6585	3380	3205
Կարսի	90	2305	1717	2964	5643	10324	5411	4913
Պարսկաստան	24	2408	925	3195	6334	10454	4022	6432
Էրզրումի վիլայեթ	47	4551	2470	5349	12499	20318	10059	10259
Ընդամենը	489	35128	15951	46085	91823	153859	75109	78750

Այսպիսով, Հայ գաղթականների ընդհանուր թիվը, ըստ 1916թ. մեկօրյա ցուցակագրության, կազմում էր 184.859¹²:

¹¹ Տե՛ս Համբարձբեր, 3. I. 1916:

¹² Տե՛ս ՀՀ ՊԿՊԱ, ֆ. 28, ց. 1, գ. 132, թ. 30:

Աղյուսակ 2. Որտեղից են գաղթել փախստականները (ըստ 1916թ. հունվարի 14-ի մեկօրյա ցուցակագրության)¹³

Բնակության վայրերը տեղահանությանից հետո	Բնակության վայրերը մինչև տեղահանությունը									
	Թուրքիա							Պարսկաստան	Ռուսաստան	
	Երևանի վիլայեթ	Վանի վիլայեթ	Բիթլիսի վիլայեթ	Ալաշկերտի վիլայեթ	Հիսկլի վիլայեթ	Գլարեթի վիլայեթ	Կ. Պոլիս			
Երևանի նահանգ	2956	11957	5174	4	4	6	1	114	176	2
Թիֆլիսի	686	1041	1367			4	2	27	50	14
Գանձակի	27	1667	585							
Կարսի	864	662	625					72	73	9
Պարսկաստան	177	1196	283					752		
Էրզրումի վիլայեթ	1556	2063	931			1				
Ընդամենը	6266	18586	8965	4	4	11	3	965	299	25
ընտ.	-	-	-	-	-	-	-	-	-	-

Որոշակի հետաքրքրություն են ներկայացնում աղյուսակ 2-ում ամփոփված տվյալները: 1. Ի տարբերություն գաղթականության առաջին շարժի (1914թ. դեկտեմբեր), փախստականների երկրորդ հոսքի ճնշող մեծամասնությունը եղել են արևմտահայերը՝ 96,8 %: 2. Փախստականների ամենամեծ խումբը կազմում էին Վանի վիլայեթի հայերը՝ 52,9 % (18.586 ընտանիք), երկրորդ խումբը՝ Բիթլիսցիները (25,5 % կամ 8.965 ընտանիք), երրորդ խումբը՝ Էրզրումի վիլայեթի հայերը (17,8 % կամ 6.266 ընտանիք): 3. Արևմտյան Հայաստանի մյուս վիլայեթներից (Խարբերդ, Սվազ, Դիարբեքիր), Անդրկովկասում և Ռուսաստանի նվաճած երկրամասերում ըստ էության գաղթականներ չկային (ընդամենը՝ 19 ընտանիք): Վերոհիշյալ վիլայեթների հայերը կամ ոչնչացվել էին կամ էլ տարագրվել արաբական անապատները: 4. Գաղթականների գլխավոր ապաստանը Երևանի նահանգն էր՝ 58 % (20.394 ընտանիք):

Չնայած իր որոշ թերություններին՝ 1916թ. մեկօրյա վիճակագրությունը համեմատաբար ավելի հիմնավոր աղբյուր է, քան դրանից առաջ և հետո կատարված վիճակագրությունները: Այն լույս է սփռում ոչ միայն փախստականների թվաքանակի, կազմի, շարժի, զբաղմունքի, բնակության վայրերի, կրած նյութական վնասների, այլև գաղթի ընթացքում և դրանից հետո նրանց ֆիզիկական կորուստների մասին: Հաշվառման արդյունքը բավական տխուր պատկեր ունի: Փախստականները տվել էին շուրջ 70.000 զոհ, որից 20.000-ը սպանվել էին գաղթի ընթացքում, թուրքական բանակի և քրդական զինվորական կազմավորումների հարձակումներից, 50.000-ը զոհ էին գնացել սովին և համաճարակին՝ 1915թ. հուլիս - 1916թ. հունվար ընկած միջոցում:

¹³ Նույն տեղում, թ. 32:

Աղյուսակ 3. Փախստականների տված զոհերի քանակը (թուրքերի կողմից սպանվածներ, սովից և համաճարակներից մահացածներ)¹⁴

Նահանգներ	Ընտանիքների թիվը	Հոգի	Ընտանիքից հեռացածներ		
			մեռածների թիվը	սպանվածների թիվը	ընդամենը
Երևանի	20394	92928	32875	14344	47219
Թիֆլիսի	3191	13250	969	589	1558
Գանձակի	2279	6585	9720	1622	11342
Կարսի	2305	10324	16		16
Պարսկաստան	2408	10454	723	524	1247
Հրզրումի վիլայեթի	4551	20318	5225	2500	7725
Ընդամենը	35128	153859	49528	19579	69107

Առհասարակ շատ մեծ է եղել Կովկասի հայոց բարեգործական ընկերությունը կից Հայկական կենտրոնական կոմիտեի ղեկը գաղթականների ընդունման, տեղավորման, պարենավորման և բուժսպասարկման, հետազայում հայրենադարձության կազմակերպման, ինչպես նաև հայ որբերի պահպանման և նրանց կրթական գործի կազմակերպման բնագավառներում, որը, անշուշտ, առանձին ուսումնասիրության նյութ է:

Հիմնահարցի գիտական ուսումնասիրման տեսակետից մեզ հետաքրքրողն այն փաստն է, որ սկսած 1916թ. մայիսից ոչ միայն Անդրկովկասի, այլև Կովկասյան ռազմաճակատի շրջանում գտնվող բոլոր ազգությունների փախստականների օգնության գործը հանձնարարված էր Կովկասի հայոց բարեգործական ընկերությանը: Որոշ ուսումնասիրողներ Կովկասի հայոց բարեգործական ընկերության հաշվետվություններում գաղթականության թվաքանակի վերաբերյալ շրջանառության մեջ դրված հսկիչ թվերի տակ տեսնում են միայն հայ գաղթականներին, որը չի համապատասխանում իրականությանը, և, անշուշտ, անտեղյակության արդյունք է: Ահա թե ինչ է գրում Հ. Էլչիբեկյանը՝ խոսելով Հայաստանում 1917թ. փետրվարյան հեղափոխության շրջանում ստեղծված կացության մասին. «Պատերազմի տարիներին թուրքական յաթաղանից ազատվելու համար Արևմտյան Հայաստանից Անդրկովկաս գաղթեց մոտ 300 հազար հայ»¹⁵, որից հետո հարգարժան գիտնականը հղում է Կովկասյան հայոց բարեգործական ընկերության 1917թ. հաշվետվությունը:

Մեր վերլուծությունները և գաղթականության թվակազմի վերաբերյալ տրված աղյուսակները ցույց են տալիս, որ Անդրկովկասում երբեք 300 հազար արևմտահայ գաղթական չի եղել: Պարզապես այդ թվաքանակում արտացոլված է ոչ միայն հայ, այլև մյուս ազգությունների (հույն, ասորի, մուսուլման) գաղթականների թվակազմը: Որ դա այդպես է, երևում է Կովկասի հայոց

¹⁴ Նույն տեղում, թ. 35:

¹⁵ Հայ ժողովրդի պատմություն, հ. VI, Ե., 1981, էջ 614:

բարեգործական ընկերության 1917թ. սեպտեմբերի 15-ի զեկուցագրից՝ ուղղված Կովկասյան ռազմաճակատի փախստականների տեղավորման խորհրդի գործադիր կոմիտեին: Այնտեղ ասվում է. «Կովկասյան ռազմաճակատի գաղթականների կենսամթերքով մատակարարումը 1916թ. մայիսից հանձնարարված է Կովկասի հայոց բարեգործական ընկերությանը: Այդ ձեռնարկի ֆինանսավորման համար տարբեր ժամանակներում հիշյալ Ընկերության գանձարանից բաց է թողնվել 1.600.000 ռուբլի: Անդրկովկասում, Թուրքիայի և Պարսկաստանի գրաված մարզերում Ընկերության կողմից մինչև հիմա բացված են 40 պարենային պահեստներ: Ընկերության նշված պահեստներից առաջին անհրաժեշտության ապրանքներով մատակարարվող բոլոր ազգություների գաղթականների թիվը հասնում է մինչև 300.000 մարդու»¹⁶:

Ասված է պարզ և որոշակի. Կովկասի հայոց բարեգործական ընկերության խնամքի տակ էին գտնվում ոչ միայն Անդրկովկասում ապաստանած, այլ նաև Արևմտյան Հայաստանում և Պարսկաստանի հյուսիսում ռուսական զորքերի կողմից նվաճված մարզերի բոլոր ազգությունների գաղթականները: Աղյուսակ 4-ը պատկերացում է տալիս Կովկասյան ռազմաճակատի շրջանում (Անդրկովկաս, Արևմտյան Հայաստան, Ատրպատական) 1917թ. օգոստոսի տվյալներով առկա եզդի, մուսուլման, քուրդ և թուրք գաղթականների թվականների վերաբերյալ:

Աղյուսակ 4. Մուսուլման, եզդի, քուրդ, և թուրք գաղթականների թվականներ

Մարզը, նահանգը, շրջանը	Եզդի	Մուսուլմաններ	Քրդեր	Թուրքեր	Ընդամենը
Բաթումի մարզ	—	4417	—	—	4417
Կարսի մարզ	—	12596	—	—	12596
Թիֆլիսի նահանգ	—	98	—	—	98
Ելիզավետպոլի նահանգ	—	202	—	—	202
Երևանի նահանգ	—	90	9796	—	9886
Խորասանի շրջան	—	—	—	135	135
Բայազետի և Դիաղինի շրջան	4549	25	3142	—	6709
Վանի	—	191	—	—	191
Էրզրումի	—	1440	48	—	1488
Ղարաքիլիսայի	—	—	358	—	358
Տրապիզոնի	—	7088	—	—	7088
Դիլմանի	—	843	—	—	843
Ընդամենը	4549	26990	13344	135	45011

¹⁶ ՀՀ ՊԿՊԱ, ֆ. 28, ց. 1, գ. 680, թ. 15 (ընդգծումը մերն է - Է.Դ.):

¹⁷ Նույն տեղում, թ. 21:

1917թ.¹⁷

Կարծում ենք, որ հետագա տարիներին արևմտահայ գաղթականության թիվն Անդրկովկասում չէր կարող ավելին լինել, որովհետև Անդրկովկասում ապաստանած արևմտահայ փախստականներից շուրջ 150 հազարը 1917թ. Հայրենադարձվեցին Արևմտյան Հայաստան: Թուրքական զորքերի 1918թ. արշավանքի ընթացքում նրանց մի մասը փախավ Անդրկովկաս, իսկ մյուս մասը (շուրջ 50 հազար՝ հիմնականում Վասպուրականի շրջանում հավաքվածներից), վերջապահ մարտերով, անցավ Պարսկաստան՝ անգլիացիներին միանալու նպատակով (հետագայում սրանց մի մասը կազմեց այսպես կոչված Բաքուբայի գաղթականությունը):

Այսպիսով, պատմագիտության մեջ արևմտահայ գաղթականության թվաքանակի շուրջ չրջանառված հակասական տվյալները հետևանք են այն բանի, որ ցեղասպանությունից փրկված արևմտահայ բռնագաղթյալների և փախստականների ամբողջական պատմությունն անբավարար է ուսումնասիրված, իսկ հիմնահարցի առանձին կողմեր, մասնավորապես արևմտահայ գաղթականության՝ իրականությունը մոտ թվաքանակի ճշտումը ուսումնասիրողների տեսադաշտից դուրս է մնացել: Ընդհանուր առմամբ արևմտահայ գաղթականության թիվը, նշանակում է ճշտել ցեղասպանության զոհերի թիվը: Սա կարևորվում է նրանով, որ ժամանակակից Թուրքիայի ու պետական քարոզչության բոլոր միջոցները, փորձելով ժխտել Հայոց ցեղասպանությունը, այդ նպատակով վիճարկում են նաև զոհերի թիվը:

К ВОПРОСУ О ЧИСЛЕННОСТИ ЗАПАДНОАРМЯНСКИХ БЕЖЕНЦЕВ В ЗАКАВКАЗЬЕ (1914 – 1917 гг.)

Э.Г.ДАНИЕЛЯН

Резюме

На основе достоверного статистического материала сделана попытка уточнить реальное число западноармянских беженцев, нашедших убежище в районах дислокации войск Кавказского фронта и в Закавказье. Некоторые исследователи в общую численность беженцев из Западной Армении включали как восточноармянских беженцев, так и беженцев-армян из Персии.